

摘藻堂四庫全書薈要

史部

欽定四庫全書小會要

史部

聖祖仁皇帝聖訓卷十三  
四

詳校官編修臣繆晉



欽定四庫全書薈要卷七千七百八十三

史部

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十三

武功一

康熙十二年癸丑十二月丙辰

上諭議政王大臣等曰今吳三桂已叛荊州乃咽喉要地  
關係最重著前鋒統領碩岱帶每佐領前鋒一名兼程  
前往保守荊州以固軍民之心并進據常德以遏賊勢

前往官兵若沿途住歇秣馬必至遲悞著派戶部賢能司官於每日宿處齊備草豆應付

丁巳

上諭西安將軍瓦爾喀曰四川與滇接壤今吳三桂已反爾可率副都統一員悉領騎士選撥將領星馳赴蜀凡自滇入川險隘之地俱行堅守大兵不日進勦雲南俟我師臨境賊勢漸分倘有可乘之機爾即與提督相機進討至西安等處朕當刻期遣發禁旅前來駐防



康熙十三年甲寅正月己丑

上諭兵部湖南鄖陽地界三省中多曠土山谷阨塞姦民  
易於嘯聚且逆賊或乘間侵犯應預防之著於鄖陽特  
設提督一員駐兵彈壓

二月乙巳

上諭都統覺羅朱滿等曰前諭爾等統兵鎮守武昌岳州  
等處茲念長沙乃武昌咽喉又為武岡寶慶等州郡水  
陸要路接壤粵西爾等若進駐長沙既兼防水陸之衝

更可壯粵西之勢爾等啓行日可即移檄廣西將軍提撫使知我兵已赴長沙保固湖南令伊等亦各守疆土朕遙度兵勢似宜如此至軍中情形或有難行之處當相機調度不必拘泥慮違朕旨

甲寅湖廣總督蔡毓榮疏報長沙副將黃正卿叅將陳武衡以城叛降賊

上諭寧南靖寇大將軍多羅順承郡王勒爾錦曰都統覺羅巴爾布護軍統領伊爾度齊額司泰等兵抵荊州是

時常德澧州尚未有變理應稍休馬力速赴常澧以戢  
兵民乃遲久不前以致常澧相繼皆陷今長沙亦有變  
可俟都統鄂內等兵至荊州令其鎮守荆彝諸處即令  
都統巴爾布等進兵攻取常澧又襄陽為我師來往之  
衝蜀寇必窺之地王軍前漢軍都統副都統可酌率官  
兵留鎮襄陽

庚申

上命都統覺羅朱滿守岳州諭之曰岳州為水陸衝要亟

宜固守令都統尼雅翰等率水陸兵並進以備應援爾  
前往岳州並趣尼雅翰等速行

辛酉

上諭吏部兵部陝省係邊陲要地西控番回南通巴蜀幅  
員遼濶素號巖疆茲逆賊吳三桂煽亂滇黔四川從逆  
秦省地處隣封恐有奸徒搖惑以致人心不寧雖督撫  
提鎮等官各盡乃職但軍務繁重必須專遣大臣假以  
便宜相機行事方可綏靖中外保固邊疆刑部尚書莫

洛前任秦督深得軍民之心諳曉地方情形茲特授為  
經畧率領滿兵駐劄西安一切應行事宜不由中制兵  
馬糧餉悉從調發文武各官聽其選用吏兵二部亦不  
得掣肘其巡撫提鎮以下官員悉受節制

三月壬申

上諭寧南靖寇大將軍多羅順承郡王勒爾錦等曰朕覽  
都統覺羅巴爾布等奏議於八月進兵恢復疆土朕思  
雲貴地方尚未可輕進必俟四川全定始可進取其湖

南地界南連粵西東抵江右近聞長沙副將降賊戰船  
盡為賊有今當相機速取常德以斷長沙後路使賊兵  
彼此不及應援我師進逼長沙則賊非來降即棄城遁  
矣如此不但使賊兵膽落百姓亦早得歸耕也若不及  
今進兵使賊勢漸增妨民稼穡將來我兵深入芻糧轉  
運區處倍難朕據理揆度如此兵在千里之外豈能一  
一指示但民心易致動搖廣西音信阻隔倘江西更有  
賊警勢必遣發禁旅不惟饋餉浩繁且恐兵民之心又

生叵測爾等前出師時皆言進取雲貴之期不過八月  
今賊猶未至而已叛之長澧常德諸處亦欲待至八月  
設各處再有變者王將分兵以討否乎分之則兵單以  
次勦取則馬疲今惟先取常德長沙以寒賊膽方為制  
勝王宜集衆議以行

又

諭曰比聞逆賊吳三桂身至常德王所統兵馬進取常德  
之時狡寇知不能敵或出全力冒死以犯岳州武昌亦

未可料王若進兵當密示將軍尼雅翰都統朱滿各於所向之地酌其遠近約期共舉庶幾萬全其荊州武昌兩地軍機互相關白務宜回顧武昌王等仍相機以行

四月丁未

上諭大將軍多羅順承郡王勒爾錦等曰鎮南將軍尼雅翰奏前使雲南大臣還至武昌攜吳三桂奏疏報順承郡王朕思吳三桂素行狡詐此中疑有詭計如吳三桂服罪請降王及將軍等仍議招致之益加警備毋墮奸



謀即吳三桂束身歸命其官屬當益加防範毋分兵力  
務相機前進

五月己巳

上諭大將軍多羅順承郡王勒爾錦等曰岳州水陸諸路  
兵力單弱可於荊州甲兵每佐領再撥二三名擇大臣  
經戰者領之星夜赴援岳州如尼雅翰朱滿巴爾布等  
尚未破敵須援兵既集始可進攻非謂伊等不能擊賊  
正欲兵多力厚大創賊衆耳若四川已平當分兵三路

進取雲貴賊中兵將有來歸者赦其前罪厚加恩養其  
以此徧行曉諭至賊兵各路入犯分我兵勢又聲言渡  
江狡情叵測恐我兵偵探日久或致懈弛雖賊所不至  
之處亦宜嚴加防禦

壬辰

上諭平南王尚可喜總督金光祖提督馬雄等曰逆賊孫  
延齡奏稱督提二臣誘其都統王永年謀為不軌故不  
得已剪除王永年此係潛通吳逆故飾辭誣奏耳然孫

延齡雖叛其所部兵曾隨定南王効力國家恭養有年  
恐大兵到日槩行誅戮朕心不忍前有旨如孫延齡改  
過來降亦從寬宥爾等不可因此遂緩進勦機宜必孫  
延齡果悔罪歸誠爾等仍受降具奏其所屬弁兵感念  
國恩或殺孫延齡或率衆迎降者從優議叙即隻身歸  
者亦收留恩養其出示曉諭之

六月甲午朔

上諭平南將軍賴塔浙江將軍圖喇總督李之芳巡撫田

逢吉提督塞白理等曰耿精忠作逆蹂躪地方大千國  
法已遣發大兵於浙江江西廣東三路進剿但念其祖  
父曾宣力累朝洎耿精忠之身遽至覆亡宗祀斬絕朕  
心殊為不忍因遣人齎敕往諭如耿精忠乞降赦免前  
罪仍恩遇如初爾等不可因此遂悞進剿機宜必耿精  
忠果悔罪輸誠爾等乃受其降若仍執迷不悛其藩下  
官兵有心存忠義者或擒斬耿精忠或率衆來降俱優  
加恩賞即隻身自歸者亦收留撫恤

壬子

上諭經畧莫洛曰朝天關諸處關係最要應撥兵防守以  
為犄角且糧艘至彼遞相護送似乎有益至漢中雖有  
滿兵猶恐單弱又朝天關外尚有別路可通漢中倘我  
兵深入奸宄竊發據守雞頭關諸險亦屬可慮一切機  
宜經畧當酌量以行念保寧未復我師恐益加勞頓糧  
餉實係要務當相繼輓運勿使匱乏

戊午

上諭兵部浙江四川宜遣王貝勒貝子公等前往勦賊所以遣王等行者非謂從前在川在浙諸將軍才不及也以諸王貝勒皆朕懿親臂指可使足壯聲威耳其授和碩康親王傑書為奉命大將軍同固山貝子傅喇塔率兵往浙江授多羅貝勒董額為定西大將軍同固山貝子都統溫齊輔國公綽克託率兵赴四川

八月丁酉

上諭福建總督卽廷佐曰入閩之日海寇宜用撫耿精忠

宜用勦或用閒其相機以行

辛亥

上諭護軍統領桑額曰江右為粵東咽喉江浙唇齒所關  
綦重今兵民之心尚持兩端若不先滅地方小醜大兵  
難以前進至袁州吉安贛州尤屬要地應令滿洲兵駐  
袁州相機進取長沙否則固守地方庶三府可保無虞  
將軍當親統重兵以行毋使兵力單弱致有疎失

己未

上諭議政王大臣等曰聞岳州三面臨湖賊於陸路一面  
浚濠築壘拒守頗堅難以進取應令將軍尼雅翰率兵  
赴江西與副都統甘度海合兵并率袁臨鎮兵由袁州  
進取長沙夾攻岳州相度機宜以行

九月戊辰

上諭寧南靖寇大將軍多羅順承郡王勒爾錦曰朕手諭  
與王者再所言似合機宜又兩遣侍衛往未見王回奏  
滿漢兵宜加撫恤餽餉亦不易若何進戰一在於王今



所在蠢動豈不可虞大將軍出征進止調度必待中旨  
於古未聞因王等與賊相持朕不自暇逸屢有敕諭冀  
或有一當耳非朕欲從中制也王等始出兵時兵亦不  
為不足今四路進討王亦知之四川兵取朝天關平陽  
關在保寧與賊相距與岳州同王等勿以四川兵將抵  
貴州湖南兵可緩進保寧較岳州城更堅也康親王進  
勦閩賊雖屢奏捷朕不為喜吳三桂乃賊渠惟破岳州  
澧州方可喜耳王等初至軍前言馬未肥又言天熱多

雨難行今當可行之時王等規取岳州或渡江取澧州  
或令將軍尼雅翰往江西取長沙此三事王與貝勒諸  
將帥熟議以聞勿惟朕諭與議政大臣之議是從勉建  
良策欣聞捷音

十月丁未

上諭兵部工部武昌漢陽一帶沿江之地俱屬重要防禦  
之策不可不豫宜於沿江要害多築墩臺環列火礮令  
諸軍更番汛守以固省會又武昌臨江所在湖汊甚多

宜亟設江汎戰船多製火礮并召募鳥鎗兵一千名為戰守之用

十一月庚申朔

上諭兵部河南府乃四達之地距潼關鄖襄皆近駐師其地則所在有警俱可策應其遣副都統四格等率每佐領驍騎三名往駐河南府

十二月丙申

上諭定西大將軍貝勒董額等曰覽將軍赫業等奏經畧

莫洛於十一月二十八日帥兵啟行莫洛所統係綠旗兵巴蜀山路險惡滿洲大兵若不相繼進發恐賊輕視漢兵首尾互擊難以策應此諭到日爾等即兼程進兵接濟莫洛所統之兵速定昭化勿得遲緩貽悞大計又大兵糧餉關係甚重其令陝西督撫多發官兵水陸防護以次相繼勿悞軍需運至廣元交將軍席卜臣等轉運軍前毋得怠忽

乙巳

上諭陝西總督哈占曰適據貝勒董額等報提督王輔臣

標下官兵叛變隨即遣官齎諭招撫爾身肩重任加意  
安輯應通行曉諭念伊等倡亂官兵皆因蜀道險遠糧  
餉不繼以致畏死情迫頓生變亂誰肯甘心從逆自造  
釁殃其不得已之情朝廷具已洞悉今特遣官前來安  
撫諭旨明如皦日伊等各各父母妻子恒產如能遵旨  
來歸官職如故願為兵者仍許入伍願歸農者令回原  
籍安插爾哈占係信任特用之臣務體朕至意速行撫

諭早定地方

戊申

上諭議政王大臣等曰陝西興安州西近漢中北接潼關  
東南直逼鄖襄最為要地今秦中有警特遣大臣鎮守  
其令雲賈總督鄂善副都統希佛率兵一千赴興安保  
固漢中諸處至襄陽與興安地係接壤應令張犄角之  
勢有警則互相應援如襄陽穀城兵力單薄著大將軍  
順承郡王等酌量增兵協守

壬子

上諭王輔臣曰近據總督哈占奏稱進剿四川軍中譟變爾所屬部伍潰亂朕聞之殊為駭異朕思爾自大同隸於英王後歸入正白旗

世祖章皇帝知爾賦性忠義才勇兼優拔於儔伍之中置之侍衛之列繼命爾隨經畧洪承疇進取滇黔爾果能殫心抒忠茂著功績遂進秩總戎寵任優渥迨及朕躬以爾勲舊重臣巖疆攸賴特擢秦省提督來京陛見面

加訊問益悉爾之忠貞天稟猷畧出羣朕心深為嘉悅  
特賜密諭言猶在耳想爾猶能記憶也去冬吳逆叛變  
所在人心懷疑觀望爾獨首倡忠義舉發逆札擒捕逆  
差遣子王繼貞馳奏朕召見爾子面詢情形愈知爾果  
不負朕知疾風勁草於今見之後爾奏請入覲面陳方  
畧朕以爾忠悃夙著深所倚信且邊疆要地正資彈壓  
是以未令來京經畧莫洛奏請率爾入蜀朕以爾與莫  
洛和衷共濟毫無嫌疑故令爾同往建功茲兵變之後



面詢爾子始知莫洛於爾心懷私隙頗有猜嫌致有今日之事則朕之知人未明俾爾變遭意外忠蓋莫伸咎在朕躬於爾何罪朕之於爾誼則君臣情同父子任寄心膂恩重河山以朕之惓惓於爾知爾之必不負朕也至爾所屬官兵被調進川征戍困苦行役艱辛朕亦悉知今變起倉卒情非得已朕惟加矜恤竝勿致譴頃已降諭令陝西督撫招來安插并遣爾子往宣朕意恐爾尚懷猶豫茲特再頒專敕爾果不忘累朝恩眷不負平

日忠忱翻然悔悟斂戢所屬官兵各歸隊伍即令率領  
仍還平涼原任已往之事槩從寬宥或經畧莫洛別有  
變故亦係兵卒一時憤激所致並不追論朕推心置腹  
決不食言勿心懷疑畏有負朕篤念舊勲之意

康熙十四年乙卯正月辛酉

上諭兵部逆賊吳三桂據守岳澧諸處恃有長沙衡州之  
粟耳今安親王率師往江西令一到南昌即簡江西軍  
中馬匹由袁州取長沙斷賊糧道夾攻岳州又

諭曰今日事勢先滅吳逆為要安親王宜留兵守江西親  
統大兵或由袁州或由吉安乘便進勦湖廣攻取長沙  
倘未易下即令此兵擾賊耕種截其輓運取資於敵不  
但我兵無轉輸之勞而岳州糧盡賊可坐困吳逆自不  
能久據常澧矣其移文安親王速行

壬戌

上諭議政王大臣等曰王輔臣兵變雖下赦詔招撫猶恐  
未即歸誠擾害百姓今將軍席卜臣等兵已抵漢中送

詣軍前馬匹留漢中者亦甚多貝勒董額等其固守要害簡諸軍中願自効力者付賢能大臣躡王輔臣後如王輔臣歸順即令此兵仍回漢中倘或抗拒則相機勦定

癸酉

上諭總督哈占巡撫杭愛曰據爾等奏稱王輔臣兵變致經畧標下綠旗兵丁驚潰等語朕思秦省兵士舊在行伍者戍守著勞新行召募者驟經調遣今俱隨征遠出

深軫朕懷事出意外必非無因念其變起倉卒情非得已未忍加罪爾等即宣諭朕意速行招撫願歸營者隨便入伍願歸農者加意安插前罪一槩不究其官兵人等父母妻子現在原籍者俱行宥釋並不株連念伊等皆朕赤子特布寬典予以自新勿得執迷不悟自貽伊戚爾等廣行曉諭以副朕撫綏招徠之意

是日

上諭兵部先因王輔臣兵變令岳州官兵速進今王輔臣

既具疏悔罪雖未即降而大兵雲集秦地已可無虞宜行文貝勒尚善若岳州可取即速進兵如勢有未便不宜輕動前已敕安親王由袁州取長沙度其將到相機前進

是日

上諭貝勒董額總督哈占曰王輔臣雖具疏悔罪正恐借此以緩我師乘閒為固守計若王輔臣果聽命待罪我兵但守疆界脫或揚言投誠而仍肆擾害勢將蔓延爾

等即相機勦禦

丁丑先是

上諭議政王大臣等曰蘭州近邊要地應速遣兵駐守今保寧大兵已回西安達里善巴圖魯兵亦將至西安其將西安現在兵每佐領下撥四五名以上令將軍阿密達副都統鄂克濟哈夸代率赴蘭州勦禦逆賊併防階州文縣諸處至是大將軍貝勒董額奏稱蘭州宜遣兵防守但保寧還卒鎧甲不備達里善巴圖魯兵兼

程而來恐難驟遣今將西安兵發往倘王輔臣由

陳倉斷我棧道自秦州平涼一時來逼深為可虞

上諭曰據報逆賊已逼蘭州若不遣兵速援賊將猖獗臨

鞏被陷勢難猝定蘭州距秦州不遠我兵若往蘭州則  
秦州便可襲取而平涼諸賊亦可首尾夾攻阿密達等  
以文到之日即速赴蘭州保固三邊倘逆賊中道阻截  
即攻取平涼或奪路前赴蘭州其相機以行貝勒等速  
備馬匹器械給保寧回兵其達里善巴圖魯之兵應給



與馬匹以備勦禦

乙酉隨征總兵官黨塞上京告興安兵變

上命黨塞齎敕往諭興安軍士曰據黨塞面奏王懷忠平日待下貪苛行事乖戾衆心不服以致激變朕以爾等隨征四川勦殺賊寇戮力勞苦今倉卒之變出於萬不得已非夙圖悖亂者比是以未忍加罪特頒寬典嘉與維新已降敕大將軍貝勒總督宣諭今又令總兵官黨塞齎敕明布朕意將爾等從前罪愆槩行赦宥其各歸

營伍勦賊樹功以圖後效勿懷疑懼以負朕寬宥恩撫至意倘仍觀望稽遲或聽奸宄煽誘之言肆意妄行則國有明法勿遺噬臍之悔

戊子大將軍安親王岳樂奏稱江西所在賊擾臣若帥師前往長沙則江西兵單可慮今或進取長沙或先滅江西諸賊請

旨遵行

上諭曰逆賊吳三桂久據湖南奸宄乘勢竊發滇黔川閩

遂爾淪陷廣西陝西逆孽猖獗湖南一隅為賊根蒂四方羣寇所觀望必速滅吳三桂底定湖南則各地小醜聞風自散今荊州兵未能渡江而岳州兵又難驟進王抵江西宜由袁州直取長沙一以斷賊餉道一以分賊兵勢一以扼廣西咽喉一以固江西門戶烏合之衆自當瓦解荆岳大兵即可乘機直進況寧羌告變川賊必通楊洪二賊窺我鄖襄擾我南鄧侵我荊州後路揆其大勢進兵湖南斷不容緩且南方卑濕延至夏月霖雨

連綿大兵坐守日久不但戰馬多斃糧餉亦恐不繼是  
進取湖南不再計決矣王宜將江西要地速行整理稍  
稍就緒即進取湖南勿得坐視致悞機會

五月甲戌

上諭兵部欲平陝西諸寇必先取秦州欲取秦州必須大  
礮今海爾圖等率兵護送紅衣礮與賊相持於仙逸關  
恐諸將各自擁兵互相推諉致悞軍機其令周有德海  
爾圖為統領前赴貝勒軍又

諭曰時方炎暑安親王酌留官兵固守建昌等處率大軍暫回南昌養馬俟秋涼或取湖南或攻福建候旨以行將軍額楚副都統席布等應速平廣信賊臨分水關陽為前進斷仙霞後路斯時康親王即令將軍賴塔等兵攻取仙霞或康親王兵與額楚等兵兩路竝進夾攻江山縣賊寇二王亦宜遙為聲援以赴機會

七月丙午

上以叛逆王輔臣再疏陳奏有蒙思念及兵民槩從赦宥

但如何安撫天語未及在事兵將未免瞻顧等語  
特諭諸將曰前頒敕諭炳若日星且秦州等處投誠官兵  
已安插得所逆賊王輔臣豈不知之若果歸順當遣伊  
子王繼貞或標員齎奏乃槩不遣發而本內詞語又復  
驕倨明係借端推諉希冀緩兵著將軍侯張勇速赴秦  
州會同大將軍貝勒董額等酌量留兵防守秦鞏等處  
速行進取平涼提督陳福速取固原夾攻平涼將軍畢  
力克圖統領官兵速往會將軍阿密達軍前都統海爾

圖等速運紅衣礮赴平涼仍固守隴州斷賊後路

癸丑靖逆將軍侯張勇奏稱聞大草灘夷人乘虛  
窺伺乞回駐莊浪以便兼轄

上諭曰秦州鞏昌蘭州諸處雖次第恢復而底定全陝惟  
在速取平涼逆賊王輔臣一日不滅則秦省百姓一日  
不安將軍侯張勇應同大將軍貝勒董額等會商速定  
平涼不宜回駐莊浪如夷人果顯然作惡擾害邊民即  
令總兵官孫思克回甘州防禦

八月己未陝西總督哈占奏稱興安叛兵與蜀寇合將逼西安請分諸將軍兵應援

上切責之曰始王輔臣叛朕以蘭州要地關係三邊令哈占發兵鎮守哈占稱西安要地不便分兵致蘭州諸處淪陷三邊搖動繼哈占復以西安要地屢疏請兵因將荊州大兵陸續調赴西安遂致荊州彝陵兵力單弱又延安為諸路要衝曾命鄂善周有德等駐守哈占又誑奏鄂善等兵少留之西安致延安陷沒哈占封疆大臣



每當議事不一體籌度但於己身所在常欲重兵自衛  
不求速定地方貽誤匪小今又稱叛兵與蜀寇合欲分  
諸將軍兵悉赴西安是哈占但知有西安置他處於度  
外矣且蜀寇何能使與興安叛兵合即至西安不過因  
諸將齊赴平涼故為聲揚欲亂我軍心分我兵勢耳諸  
將當益急攻平涼勿得稍緩王輔臣未滅西安潼關亦  
宜增兵勦禦

十月甲戌

上諭兵部頃大將軍貝勒董額等報興安賊衆犯商州大  
峪口川賊譚洪救平涼皆因王輔臣未滅我兵俱集平  
涼故諸賊乘隙侵犯欲分我兵力以援王輔臣今董額  
等官兵至平涼日久自宜作速攻取設使平涼未破而  
四川與興安之賊俱至大兵往來路阻後雖恢復平涼  
亦復何益若平涼破王輔臣滅則賊應援之念絕而窺  
伺商州之計亦阻陝西無可虞矣由平涼南山俯視城  
中甚悉若據南山放紅衣礮城中賊衆自不能支董額

等速奪南山以取平涼可也

十二月戊午定西大將軍多羅貝勒董額以官兵  
攻平涼溝深地險城未能速下具奏

上諭曰逆賊久踞平涼皆因有糧可恃若斷其餉道則賊  
自窮平涼西北通固原要路大將軍貝勒等宜速斷截  
以困斃之

壬戌

上諭安親王岳樂曰招徠逆賊克取福建令大將軍簡親

王副將軍希爾根將軍額楚總督董衛國等相機以行  
至於進攻長沙勦滅吳逆惟王是賴但恐逆賊覘知我  
兵進取長沙固守袁吉阻我兵行王或揚言取道別路  
出其不意或合兵前進或兵分數道在王必有定見其  
悉心籌畫萬全務速行之

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十三

欽定四庫全書薈要卷七千七百八十四

史部

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十四

武功二

康熙十五年丙辰正月辛卯

上諭大將軍貝勒董額將軍侯張勇總督哈占等曰秦省  
不能卽定皆平涼未下王輔臣未滅之故目前攻取平  
涼最為緊要爾等宜相機公議速定平涼斷賊餉道綏

靖地方

二月壬戌

上諭兵部大將軍貝勒董額等屯兵平涼日久賊寇尚未  
勦滅城池尚未恢復夫秦省不能卽定川賊尚在窺伺  
者皆由王輔臣未勦滅平涼未克取故也其以都統大  
學士圖海為撫遠大將軍率每佐領護軍二名亟赴陝  
西總轄全省滿漢大兵斷賊餉道勦滅平固逆孽速靖  
地方大將軍抵平涼時盡收將軍敕印遇有分遣酌量

給付其貝勒董額以下悉聽大將軍節制

乙丑

上諭議政王大臣等曰見駐寧夏滿洲蒙古大兵無人統轄其仍授都統畢力克圖平逆將軍印止以所部前鋒赴寧夏統轄滿洲蒙古大兵鎮守地方俟草青時酌調鄂爾多斯兵協力進取平固

己巳

上諭兵部據平南王尚可喜疏報賊犯惠州肇慶諸處省

會危急朕思粵省要地倘有疎失為害不小頃雖調遣江西兵仍恐單薄今以兗州每佐領驍騎兵一名蒙古兵七百名調赴江寧其見駐江寧每佐領驍騎兵一名蒙古兵六百名及駐防徽州池州滿洲蒙古兵七百名令將軍哈爾哈齊統領馳赴粵東如有稽遲坐以失誤軍機之罪其哈爾哈齊所用平寇將軍印留付副都統科爾科代鎮守江寧其徽州池州餘兵七百名恐難捍禦地方或令見駐安慶提督移鎮池州或撥蘇州駐防



五百甲兵往駐徽池將軍總督等公同酌量調遣至山東兗州戍防不可無兵大將軍圖海所統兵內分每佐領一名往山東駐守俟盛京兵到時遣發圖海軍前

辛未

上諭兵部前命康親王傑書為大將軍平定閩省伊奏先滅浙寇再進福建即允其請後授貝子傅喇塔為將軍進取黃巖乃借稱修橋造船展轉遷延為日甚久屢下詔嚴催始取黃巖前赴溫州時曾言紅衣礮至即取溫

州今據伊報稱礮已齊集而溫州之得與未得並未聲明師行猶豫若此何時始得入閩王貝子率領大兵駐浙江曠日持久以致師老餉匱今溫州如尅期可取即當速行進取倘不能即克宜酌量分兵留守王親統大兵即克取福建如仙霞嶺路險難進或由分水關入或別從何道而進當相機作速進兵福建一定則江西之兵可以全力勦賊而吳三桂亦可指日滅矣王貝子係朕懿親大小將弁皆素所信任當各効心膂奮力前驅

如仍瞻顧不前則師益老餉益匱貽誤大事莫此為甚  
王等其勉副委任乘此事機作何進止速議以聞

甲戌

上諭兵部貝勒尚善等統領大兵往駐岳州將及二載竝  
未移師前進作攻城破賊之勢因循坐守令師老財匱  
今因大將軍安親王由袁州進取長沙湖南逆賊遂欲  
分我大兵之勢來犯江廣前據報岳州賊衆分遣往援  
尋陵等處則岳州賊勢已分貝勒尚善貝子章泰公蘭

布皆朕懿親委以重任都統朱滿護軍統領額司泰副都統路什阿晉泰前鋒統領噶爾開等皆以勝任擢用巡撫韓世琦提督桑額亦以才幹著稱擢付封疆重任今岳州滿洲蒙古兵為數不少又提督桑額標下士卒頗多湖南賊勢既分即應整理甲兵為進取岳州之勢可取則取不可取須覘賊虛實或發兵過岳州攻長沙賊出即擊殺之使逆賊之勢潰亂不能分擾他處則江西廣東可以少息而大將軍安親王亦從容克取萍鄉

進圖長沙矣尚善等竝不思勦滅賊衆恢復地方負朕  
委任之意又不切行偵探逆賊情形度有機會奮力前  
進賊兵分援各處安坐罔聞止知自守汎地各保身軀  
不能少進尺寸若謂逆賊深其濠塹多用火器以傷我  
軍如值大雨之時其火器尚可用耶總之不實心任事  
致賊得以任意應援貽誤軍機莫此為甚若仍前不改  
逆賊何日得滅地方何日得平尚善等以文到日即宜  
作攻取岳州發兵長沙之勢以分賊力倘有機可乘速

行進取又

諭曰吉安為進通廣東要地今聞吉安為賊將高大傑等所圍應速發兵救援著見駐江寧將軍哈爾哈齊於率赴廣東兵內選其半馳往南昌與大將軍簡親王喇布副將軍希爾根等會商即於所帶兵及南昌兵內酌量派出領赴吉安破賊解圍通入廣之路此路既通哈爾哈齊仍率兵赴粵其所留江寧之兵交賢能夸蘭大俟兖州兵到即令適往其吉安情形竝移文大將軍安親

王知之以便隨機策應

戊寅

上諭兵部今大將軍安親王將賊固守之地攻破賊已喪  
膽宜即乘機直取湖南但我兵進取湖南時逆賊吳三  
桂或撤諸處賊兵往長沙抗拒亦未可知著行文荆岳  
大將軍王貝勒等飭勒兵馬時加偵探乘機進剿

辛巳

上諭兵部今賊兵聲言斷關山道關山險要之地將軍席

卜臣總督哈占宜相地方緩急調各隘官兵往守關山將軍侯張勇兼程速回同將軍佛尼勒等堵剿出犯秦鞏之賊自後一切軍機大將軍董額等一面奏聞一面具報大將軍圖海知之

三月癸巳

上諭兵部今逆賊吳三桂分遣賊兵應援長沙大將軍安親王兵已經深入赴援之賊甚多恐相持遲延時日貝勒尚善等宜乘機速行攻取岳州倘未可取則分兵徑



過岳州絕賊餉道若慮岳州兵力單薄可調武昌兵以資防守其彝陵諸處賊勢既分順承郡王勒爾錦貝勒察尼等或攻破彝陵上流賊衆或整理舟師以張渡江之勢俾賊潰亂不能救援長沙一帶倘有機會可進即渡江酌量速進至南漳逆賊既經退回即調南漳諸處大兵赴荊州併力破賊大將軍王等仍量留官兵同總兵官劉成龍防守南漳

辛丑

上諭議政王大臣等曰安親王軍已深入湖南亟宜添發

大兵應援今大將軍圖海兵尚在懷慶應以戍守河南  
兵每佐領驍騎一名選才能者署為夸蘭大領赴岳州  
其叅領胡世巴額勒布暫駐懷慶再發京師每佐領驍  
騎一名與盛京兵一千五百名合為一營令叅領達漢  
泰沙禮領之抵河南日以盛京兵五百名留與胡世巴  
等防戍河南餘令達漢泰等率赴岳州前大將軍貝勒  
尚善等奏請添發每佐領兵四名便可分遣由雲溪驛

赴長沙今所發禁旅並河南盛京兵已足每佐領四名之數此兵未到時若長岳二郡尚未恢復大將軍貝勒等酌撥官兵速援長沙與大將軍安親王合兵攻取平定湖南其盛京兵一千名速添發大將軍圖海軍前

四月庚申

上諭兵部今吳啓鎮尚之信受吳三桂偽將軍號總兵苗之秀等相繼以叛總督金光祖等降賊廣東變亂則江南江西殊屬可虞若閩粵諸賊會犯京口等處則江南

兵單難以防禦且江西告急自江南往援甚便官兵不可不增其調大將軍圖海所領盛京兵一千名及駐防兗州每佐領驍騎一名遣赴江南發京城每佐領兵一名駐兗州其江南滿洲蒙古兵令將軍華善用平寇將軍印統轄以學士薩海署副都統科爾科代為叅贊副都統楊鳳翔以安南將軍印駐防京口其遣赴江南之兵到日將軍華善王之鼎及叅贊大臣督撫等會同整飭軍馬以待調遣尋大將軍簡親王喇布果請兵援江

西

上諭曰粵東之事如此則長沙宜急攻取今貝勒察尼總督蔡毓榮既回荊州則自河南發往荊州之兵可速遣赴岳州貝勒尚善亦分兵自陸路趨長沙與安親王協力進取簡親王等應即令將軍哈爾哈齊額楚等速取吉安與將軍舒恕等合兵禦閩粵諸寇以繼安親王大兵之後

五月癸巳

上諭兵部今聞南安餉缺閩粵諸寇來犯贛屬地方贛州  
既危應速取吉安合兵勦賊簡親王等亟檄將軍哈爾  
哈齊額楚提督趙賴等克取吉安會合將軍舒恕額赫  
納之兵撲滅閩粵諸寇竝檄舒恕等酌量倘可由贛攻  
吉即分兵夾攻之

六月丙辰

上諭兵部聞賊船七十餘隻自衡州來泊蒼頭鋪又賊兵  
三千來犯攸縣逆賊知安親王進取長沙欲斷大軍後

路窺伺袁州亦未可定江西既發有江南大兵省城又有總督駐守簡親王喇布副將軍希爾根其以文到之日即檄無事地方官兵赴袁州駐鎮勦禦賊寇

戊辰

上諭兵部近覽大將軍簡親王喇布總督董衛國等奏稱尚之信背恩反叛逆賊孫延齡馬雄等分路來寇江西袁州諸處聞賊亦乘機侵犯江西逆賊吳三桂部下高杰死守吉安大兵尚未克復等語見在江西兵力單

弱分布勦禦防守地方又欲接應大將軍安親王兵實  
難支應貝勒尚善請分岳州兵遣發江西大有裨益今  
阿晉泰韓世琦雖往長沙其自京師發出每佐領兵四  
名見到岳州可將兵合計量留防守其餘官兵即令起  
程竝嚴飭將弁兼程速往

十月壬申

上諭兵部據征南將軍穆占疏請令大將軍圖海率兵同  
赴湖廣再於荆岳彝陵兵內揀選發往以滅吳逆并進



取四川雲南朕思陝西兵隨征各處勤勞備至運糧民  
多苦累若復進取四川恐征勦轉輸兵民重困平涼雖  
已底定軍中缺乏馬匹新附兵心猶未大定大將軍圖  
海及新附兵不便調往湖廣且荊州諸處有大將軍順  
承郡王勒爾錦貝勒尚善都統鄂內宜理布等統兵駐  
守又大將軍安親王岳樂統率大兵圍困長沙前令穆  
占率兵抵湖廣日將荊州諸處兵每佐領配足十名又  
添撥蒙古兵及陝西湖廣綠旗兵隨往兵力不為單薄

今宜仍遵前旨施行迨克復地方其應設鎮守官兵調遣機宜與各將軍總督提督等議行著大將軍安親王順承郡王貝勒等探知穆占何處進兵即相機應援

十一月辛卯

上諭兵部醴陵陷賊頃者賊又聲言犯萍鄉諸處朕思醴陵萍鄉為安親王大將軍後路所關非細副都統席山雖已赴袁州仍恐兵力單弱今閩省已定建昌諸處似可稍紓大將軍簡親王及副將軍希爾根總督董衛國

等量調建昌撫州樂平饒州南昌等處滿漢官兵速赴  
袁州萍鄉諸處同副都統席山楊古代總兵官趙應奎  
等協力勦賊疏通道路仍閒道移會安親王若可發長  
沙兵量行速發夾勦

丙申

上諭大將軍順承郡王勒爾錦等曰爾等故違指授遲延  
時日以致逆賊得閒四出應援今荆岳之兵安處日久  
馬皆肥壯著將軍穆占速赴湖廣簡選荆岳彝陵士馬

由岳州趨長沙接應安親王兵若長沙軍無虞或出尋陵或取岳州或由荊州渡江便宜進發

十二月己巳

上諭兵部賊衆來援吉安又聲言犯萍鄉賊帥馬寶等率賊兵已至永新安福竝欲為吉安救援朕思逆賊吳三桂知我荆岳大將軍等斷不進兵故身往常德調集賊衆併力於長沙吉安將軍穆占速選荊州士馬相機前進以分長沙吉安賊勢平定湖南大將軍簡親王喇布

等嚴飭所部保固疆圉

康熙十六年丁巳正月庚寅撫遠大將軍都統大學士公圖海奏稱二月進取漢中興安將軍侯張勇以為宜俟秋成再舉

上曰大兵即克復漢中興安須設重兵重兵一設則運餉維艱若俟夏秋進取又頓兵曠日虛糜糧糗今將軍穆占方勦吳逆機不可失圖海等其暫停漢興之役留滿洲蒙古兵一萬同綠旗兵防守秦州諸隘分兵五千遣

大臣一人統赴荊州到日順承郡王等量留官兵防守  
荊州羣陵諸處乘穆占由岳州長沙進取湖南時相機  
渡江破賊

庚子

上諭兵部簡親王喇布疏報來援吉安賊衆宵遁或因將  
軍穆占進兵長沙聞風掣回或謀潛襲袁州俱不可料  
今吉安已調建昌諸處官兵簡親王喇布等宜乘機速  
行攻取吉安至於袁州所繫甚大宜分兵固守勿致疎

虞總督董衛國其檄令總兵官趙應奎協力防禦

三月甲申

上諭議政王大臣等曰今閩地悉定大將軍安親王圍困  
長沙已久將軍穆占復帥師進勦將軍鄂內統兵水陸  
赴岳殲滅吳逆蕩平諸寇在此一舉康親王宜及兵威  
大振之時分遣官兵同耿精忠兵進取潮州其進勦留  
守機宜速議以聞又大兵分路進擊逆賊不暇窺贛其  
授署副都統莽依圖為鎮南將軍精簡士馬夾攻廣東

以副都統額赫納署副都統穆成額叅贊軍務令侍郎  
舒恕量留甲兵同巡撫佟國楨總兵官哲爾肯鎮守贛  
州諸處至江西建昌諸路大兵俱已撤赴吉安簡親王  
軍士卒甚衆酌撥每佐領兵三名合在贛大兵令莽依  
圖共選每佐領兵六七名俟康親王所議俞旨到贛即  
率之前進

乙巳

上諭議政王大臣等曰據荊州坐塘筆帖式報賊犯遠安



旋復退回逆賊或因我兵進取長沙岳州虛聲牽制亦未可知大將軍順承郡王勒爾錦等應作進兵之勢揚言渡江以疑賊兵尋定遠平寇大將軍和碩安親王岳樂等奏逆賊吳三桂糾聚賊衆死守長沙

上曰勒爾錦等作速勒兵臨江再令圖海整飭陝西滿漢官兵進扼漢中要路移檄聲言進兵以分賊勢倘機有可乘即行進剿

丙午

上諭揚威大將軍和碩簡親王喇布等曰爾等將王府佐領下兵及大兵內選有馬者每佐領三名速發贛州此兵到日將軍莽依圖等即選足每佐領七名速赴韶州仍與尚之信相聞令立圖內應袁州乃安親王大兵後路其以滿洲兵每佐領四名以上及自安慶發往綠旗兵一千竝付額楚俾赴袁州屯駐為安親王後繼前所送馬及礮抵袁州付與來迎官兵額楚仍添兵護至長沙其吉安新復簡親王可偕多諾統每佐領兵三名及

自安慶發往綠旗兵五百名竝城守官兵駐鎮吉安更撥每佐領兵一名添發贛州令侍郎舒恕統領防守其餘缺少馬械之兵竝綠旗官兵付副將軍希爾根提督趙賴令回南昌整繕候調簡親王同理事官麻爾吉酌遣幹員齎諭招撫原任貴州提督李本深巡撫曹申吉廣西提督馬雄將軍孫延齡等孫延齡果否身死竝著偵探的信奏聞

四月戊午撫遠大將軍都統大學士公圖海奏稱

臣令駐防秦州寶雞官兵進逼禮縣驛門諸處隨  
移檄聲言大兵分路進勦今欲親統重兵深入四  
川但恐時多霖雨輸輓艱難當俟機會酌量前進

上曰今將軍穆占協勦長沙貝勒尚善與將軍鄂內水陸  
攻岳故逆賊吳三桂親赴長沙集諸路賊兵死守湖南  
我兵若乘此機各路進勦則吳逆指日可滅計在陝官  
兵為數甚多當此逆賊勢分之時若不進逼四川則坐  
糜糧餉殄賊無期大將軍公圖海其仍遵前旨速行進

發

五月乙巳

上諭兵部前安親王岳樂等疏請紅衣礮隨已發往今聞  
袁州到長沙道路險阻運礮夫役既多為費實繁若礮  
一到即得長沙則解送固宜倘難猝拔則送亦何益今  
安親王兵久入湖南馬多致斃已自京撥馬陸續發往  
今將軍穆占率精兵會勦猶未克取長沙與賊對壘如  
故我兵甚衆芻秣無多即馬到長沙勢必坐致疲瘦不

堪驅策可令馬匹暫停袁州紅衣礮暫留南昌溫代先  
赴安親王岳樂將軍穆占等軍前詳議以聞

六月辛酉

上諭各省王貝勒大將軍將軍總督巡撫提督等曰逆賊  
吳三桂背恩倡亂散布偽劄誘惑兵民迫脅官吏以致  
生民塗炭所在騷然今各路大兵勦撫並行平涼福建  
廣東等處相率平定文武大小官員兵民人等俱被恩  
賞安插得所惟湖南四川雲南貴州官員兵民人等仍

陷賊中未得歸正念此等俱受國恩必非甘心從賊蓋有懷忠義之心而無脫身之路者亦有身被迫脅懼罪疑畏者今大兵雲集不日蕩平賊寇玉石難分朕心深為不忍今特頒敕諭概示招徠凡在賊中文武官員兵民人等悔罪歸正前事悉赦不問仍照常加恩或有擒殺賊首投獻軍前及以城池兵馬來歸者仍論功優敘爾等即宣布曉諭以副朕寬仁矜全之意

庚午

上諭奉命大將軍和碩康親王傑書曰據筆帖式塔穆哈圖報潮州劉進忠已於本月初六日投誠今劉進忠復遺書吳三桂為平南王尚之信舉發是劉進忠投誠本非真心不過勢窮就撫耳又總兵官劉炎所遺吳三桂書亦皆搜獲其心迹與劉進忠畧同此等皆心懷反側久留潮州必致生變若果已投誠康親王等卽托言欲與相見以計撤回留駐福州設或遲疑不至速行奏聞劉進忠等旣撤則令將軍喇哈達以兵之半守漳泉都



統賴塔率其半守潮州仍令尚之信遣原任潮州總兵官王國棟盡率其標兵詣賴塔處協守

七月丁酉

上諭兵部將軍穆占速行分道進剿湖南其進兵機宜仍行奏聞又大將軍貝勒尚善等前奏須得烏船始可破賊已命江蘇巡撫慕天顏督造今將軍穆占即統兵到岳州亦必俟烏船告竣然後進攻度烏船到彼正當隆冬水涸難以前進若俟來年水長進兵勢必坐守岳州

虛糜日月穆占宜勿赴岳州以兵會簡親王規取衡永諸處遏賊後路如此則粵東得以寬緩而粵西欲降者亦可乘間來歸穆占等其即率岳州官兵速赴茶陵攸縣與簡親王兵合協力進取衡永諸處


九月丁酉

上諭議政王大臣等曰逆賊吳三桂憑江湖之險抗拒大兵為日已久若不速行勦滅湖南民困無有已時聞逆賊多備鳥船戰艦死拒我師我師亦宜倍製鳥船沙船

多載糧米由岳江入洞庭盡占江湖斷賊糧道夾攻岳州如事屬可行應遣賢能大臣官員會同督撫尅期造船多設水師營兵同大兵齊進期於一舉滅賊但增船破賊事關緊要大將軍順承郡王勒爾錦貝勒尚善等身在地方與賊逼近應否舉行著速議以聞勒爾錦等議逆賊造船未已長江關係最重目今賊舟漸增若豫行添造烏船沙船以載數月之米甚屬有益上命添造烏船六十艘沙船二百艘戶部尚書伊桑阿赴

江南同該撫速行督造俟船將告竣量發綠旗官兵前往

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十四



總校官庶吉士 臣張能照

校對官庶吉士 臣戴心亨

謄錄舉人 臣孫潢

欽定四庫全書叢要

史部

聖祖仁皇帝聖訓卷十五  
六

詳校官編修臣繆晉



欽定四庫全書薈要卷七千七百八十五

史部

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十五

武功三

康熙十七年戊午正月庚辰征南將軍都統穆占  
奏稱吳逆自茶陵失守饋餉不給軍士胥怨民多  
遠避但茶陵等地方新復亟須堅守臣俟安親王  
等諸路兵知會到時相機進取湖南若逆賊韓大



任等逸入楚境江西大兵宜追躡至湖南庶賊可撲滅新復地方亦得無虞

上曰前命平南王尚之信率兵赴韶州會將軍額楚等由樂昌進宜章郴永其進兵可否尚之信等尚未奏知穆占所領陝西荆岳諸處將士皆經簡擇平定湖南惟此精兵是賴茲當逆賊窮蹙之時即宜速定湖南殄滅兇醜不可待尚之信等兵坐失機會至江西大兵現在征討韓大任平賊之後自有措置豈可懸揣即行指示穆



占亦不必待江西兵至湖南即鼓行滅賊亟靖疆場安親王亦宜速遣提督趙國祚赴茶陵其逆賊地方失守軍怨民遁情形可移會荆岳長沙大將軍王貝勒等知之

二月辛未

上諭兵部傳宏烈既以兵少請濟師平南王尚之信可發精銳萬人多備火藥火礮速赴廣西應援將軍賴塔會同靖南王耿精忠選藩下兵千人並劉進忠標兵五千

人付與都統馬九玉亦令疾趨廣西從莽依圖傳宏烈等併力破賊莽依圖傳宏烈以謀勇兼備並見倚任宜共相和洽同心協衷謀濟國事滿漢兵士務令輯睦俟尚之信馬九玉等兵及前所調將軍額楚等兵至或一路進發或滿洲綠旗分二路進發公同詳酌定議以聞

三月戊寅

上諭兵部項以江西底定因命大將軍簡親王進取永州寶慶遣將軍舒恕防守韶州南雄相機而行又令平南

王尚之信發兵赴廣西調將軍額楚等自肇慶赴梧州  
今諸路並進滅寇恢疆正在今日總督金光祖又稱賀  
縣開建乃粵東門戶最為緊要地方守此二處則兵餉  
可由封川輓運今閱報文將軍莽依圖傳宏烈自平樂  
回軍倘莽依圖等還至肇慶德慶俾賊得據賀縣開建  
為死守之計則復圖進取良屬不易梧州諸處將不可  
保即恐東粵亦或至動搖莽依圖等宜固守賀縣開建  
諸處如遇有機會可乘即行前進金光祖督運糧餉以

給大軍毋致有悞

甲申

上諭議政王大臣等曰岳州前後船艘多於賊數倍合此船破敵何難之有乃尚善統大兵駐岳已經數年未一大創賊寇今大將軍安親王岳樂既克平江江西湖廣道路已通侯公溫齊等兵與陝西調往之兵抵岳州日尚善可率所部大臣及每佐領兵五人赴長沙駐守令安親王率所部大臣選每佐領兵五人恢取岳州其進

取岳州時應遣將軍鄂內率舟師前進陸地則令滿漢官兵實土蘆固排列挨牌進逼賊壘晝夜火攻俾賊水陸應援不暇江之南岸石首縣城即宜攻取令水陸兵連營江岸或另立一營扼湖之險更於南潯港地方水陸立營斷賊後路安親王總統官兵相機勦援庶為有濟不必令舟師往泊君山無用之地若準此而行斷賊餉道必能克取岳州矣

乙酉

上諭議政王大臣等曰韓大任既抵福州其江西追勦官兵度已回汛大將軍簡親王宜乘此機會統率大兵亟勦湖南逆賊一應機宜可與將軍穆占定議或併力會勦或分道進發相機速行一面奏報尋征南將軍都統穆占奏請令簡親王兵與臣所部兵會合一路自茶陵取郴州耒陽諸處即自永州渡江直向衡州上曰簡親王整頓軍馬速與穆占會合詳加籌畫令江西萬無他虞保固茶陵諸處及大將軍安親王後路然後

會師一路進發平定湖南其護軍統領哈克山追勦韓  
逆直抵福建軍士馬匹羸乏可將現在南昌馬一千解  
至簡親王軍前均給缺馬軍士又

諭曰今逆賊侵犯潯州諸處梧州高州所關最要將軍莽  
依圖可駐鎮梧州若遇高州諸處有警即行應援將軍  
巡撫傅宏烈整頓士馬俟進兵平樂桂林與將軍額楚  
都統勒貝署副都統穆成額同行如兵力未足許於莽  
依圖等兵內量調前進

丙戌

上諭撫遠大將軍都統大學士公圖海曰卿前疏言秦地  
遼濶留守兵單今當進取漢中興安之期度果萬無一  
失有易復之機仍行進取但秦地所係重大卿等親率  
大兵前進而王進寶孫思克等倚任諸臣俱在戎行脫  
行後更有他虞殊難遏禦宜暫停漢興之役固守所在  
要害廣布恩威從事招撫俟後有可取之機再行奏聞  
閏三月辛丑朔揚威大將軍和碩簡親王喇布奏



報麻爾吉等抵吉安稱孫延齡為吳三桂所殺馬  
雄病死

上曰馬雄孫延齡雖死其餘黨尚踞粵西理事官麻爾吉  
等仍同簡親王軍偕行以朕赦罪論功之意概行曉示  
其被脅從賊之人有悔罪投誠者即行招撫

丁巳

上諭兵部今當逆賊震動之際穆占急宜進兵郴州耒陽  
以分賊勢耒陽諸處克復即於上游渡江斷賊歸路與

安親王協力勦寇如江未可渡則作渡江之勢畧定沿江  
江北岸地方以張安親王大軍聲勢

庚申

上諭兵部據將軍穆占奏偽將軍林興珠赴大將軍安親  
王軍前投誠逆賊俱無固志岳州長沙相距頗近貝勒  
尚善必已聞知前尚善等疏稱俟添造烏船皆至前破  
湖賊今方逆賊震驚之時若有隙可乘不必俟船齊備  
即以現在船隻進攻仍錄穆占所奏示尚善及順承郡

王知之

己巳定南將軍額駙華善奏稱茶陵為江西門戶  
重地將軍穆占留兵甚少恐吳逆乘間自衡州出  
犯安仁攸縣諸處請增發大兵為防禦計

上曰茶陵攸縣關係江西全省將軍穆占因聞安親王渡  
江故率兵深入乃安親王實未渡江倘逆賊間道來侵  
江省可慮簡親王與將軍華善前鋒統領希佛學士薩  
海等共商鎮守茶陵諸處以兵付護軍統領哈克山由

穆占進兵之路急行追及併力破賊穆占軍前聲息及逆賊情形簡親王不時奏報

四月甲戌

上諭議政王大臣等曰韓大任之兵新經招撫不宜聚處一軍著大將軍康親王叅贊大臣將軍耿昭忠及該督撫提等詳議將撫提標舊兵與新附之兵相叅配合以足兵額其統轄官員著該督選擇題補

五月庚子朔

上諭兵部詹事宜昌阿奏稱水陸大兵進攻岳州貝勒尚  
善等宜熟計萬全以期速克既克之日即乘虛速取常  
德澧州諸處勿令賊得為備尚善等前以所在逗留貽  
誤大事今宜殫心竭力勉圖自効毋得仍蹈前轍玩日  
稽時

六月壬辰

上諭兵部覽大將軍簡親王等奏逆賊以大隊犯永興有  
必死之形由我軍每佐領一二人或數百人所在遣防

兵勢太分以致失利將軍穆占大將軍簡親王其速收  
可緩之地所有防兵還駐要害會合羣力大創永興賊  
鋒務期剪滅凡摧寇破賊必審己量力可擊則擊之如  
賊衆我寡即宜調集諸路合為一軍壯其聲勢以圖攻  
勦倘株守新復城池以已經駐鎮憚於旋師遲留疑畏  
於大事殊無所濟爾部明白移文速傳示穆占簡親王  
知之

乙未

上諭征南將軍穆占曰今逆賊既併力郴永將軍穆占可  
盡撤閒地防兵擊敗犯郴賊寇保固廣東江西勿致疎  
虞并令大將軍安親王速遣兵赴大將軍簡親王軍至  
日簡親王等大振軍威剿除郴州永興之賊更令廣東  
韶州總兵官尚之瑛遣副將一員率樂昌綠旗兵二千  
速赴郴州聽穆占隨宜調遣仍授和碩額駙華善將軍  
印馳至永興總統鎮守以署副都統多諾叅贊軍務至  
於碩岱等失利即宜逮繫嚴加處分但因穆占調取官

兵所在分防致兵力單薄遂爾失機其悞事之罪穆占及碩岱俱不可辭碩岱等各暫留原任立功贖罪

是日

上諭康親王傑書等曰頃聞海澄援師退回朕心甚為被困官兵憂之此非尋常事宜奮力急為救出切勿遲疑畏難滿漢官軍間散人及廝役有能倡率衝敵直過潮溝抵於海澄救出被困官兵者准克復上等府城例從優議敘給以官職將軍以下將士即從前屢有失利退



縮之罪俱從寬宥不必顧戀城池但使被困官兵得出  
即為克奏膚功也大將軍康親王將軍賴塔喇哈達總  
督姚啟聖提督石調聲等概行曉諭滿漢官兵期慰朕  
懷

丙申

上諭兵部將軍穆占大將軍簡親王克復永興茶陵等九  
州縣之地我兵立營及賊壘所在令詳悉繪圖具奏岳  
州水陸駐兵形勢并賊所立營亦令詹事宜昌阿詳悉

繪圖具奏

七月甲辰

上諭議政王大臣等曰據福建所報海賊劉國軒等攻取同安水陸犯泉州前大將軍簡親王奏永興諸處賊勢稍退已飭將軍穆占撤閒地之兵鎮防險要而大將軍安親王所遣援師已抵攸縣岳州大兵復水陸齊舉賊欲深入能不懼歸路阻絕耶向以永興警急江右可虞因令署副都統岳爾多率師赴江西今閩中事迫岳爾

多仍率師赴福建并移文江浙督撫將軍等速各撥馬千匹給岳爾多兵俾兼程馳往副都統馬思文自京率往漢軍兵四百名亦與岳爾多同行移文大將軍康親王備夫船於浦城迎取大兵勿致有悞將軍王之鼎標兵六百名不必率往福建可仍留京口現今所發漢軍兵一千令副都統官保率赴江西南昌俟陝西所遣兵至江西視何處當用即協力從事並移會將軍穆占大將軍簡親王知悉

是日

上諭兵部福建海逆猖獗事勢急迫因令前赴江西署副都統岳爾多仍率兵赴福建江西關係重大其傳示將軍穆占大將軍簡親王等今前進擊賊倘非至急惟擊退侵犯永興諸處逆賊俾不能進薄江西福建乃為最要穆占等其同心詳酌力禦賊寇保固江西使萬無一虞以副朕懷

辛酉

上諭兵部項因海逆猖獗侵犯漳泉已調靖南王耿精忠  
侍郎達都率潮州兵往援今若撤還副都統尚之璋則  
潮州止餘總兵官馬三奇駐守宜令尚之信速趣提督  
侯襲爵前赴潮州并量發官兵以補尚之璋之缺同侯  
襲爵馬三奇協力固守又

諭曰海逆犯漳泉事在迫急浙江總督李之芳巡撫陳東  
直量留兵守浙江而於各營兵內酌便抽選二三千人  
遣往延平至浙江兵丁屢經調發福建浙地兵力單薄

該督可召募有資力壯健兵丁五千人分隸各營

壬戌

上諭安遠靖寇大將軍多羅貝勒尚善曰我船甚多諸將亦衆公溫齊副都統杭奇德業立等似宜酌遣一員於陸路賊雖各路赴援諒皆小舟少有巨艘況巨艘非旦夕可成我沙船兵亦宜抽調陸地調時毋令賊覺諸路調來綠旗之兵酌量令屯九貴山或貝子章泰或公溫齊副都統杭奇以一人駐守立營之時仍宜兼顧三眼

橋地方賊若遁走即宜進勦蓋兵貴神速也貝勒等視賊得毋藐忽賊雖非我敵猶必慎為之防至岳州一克即宜分兵往取湘陰長沙前雖有敕旨命克復岳州之後即進取常德澧州今思深入常德澧賊或襲我後饋餉不易渡馬亦難總宜臨時相機而動至於賊船僅四十餘我船甚多宜載火器於小舟乘夜擾之勿使寧息近岳州安塘筆帖式報我兵奪賊一船復沈其一船詹事宜昌阿身在彼地嗣後一切應報事宜可悉奏聞

八月甲申

上諭議政王大臣等曰今日之事岳州最要不可不速行  
攻取乘此民心警賊羣相內嚮之時朕欲親統六師躬  
行伐罪若逾此機恐滿兵不耐水土因而挫銳所遣諸  
將軍破賊無期後雖勉圖終成掣肘國家所賴在於僉  
謀此外如有早戡逆亂救民水火之策並宜預籌爾等  
其詳議之

九月辛丑



上諭議政王大臣等曰覽大將軍簡親王等奏逆賊吳三桂已死渠魁既殞賊必內變諸路將軍宜乘時各統大兵分路進剿克復疆圉永興賊既遁去簡親王宜由茶陵赴安仁進逼衡州其永興官兵勞苦已久可駐茶陵諸處暫息自陝西調來副都統夸岱所領每佐領兵二人不必遣赴茶陵即留岳州軍前大將軍貝勒察尼等務水陸夾擊速取岳州

戊申

上諭兵部吳三桂已死諸逆潰變之際宜急取岳州動支如許錢糧營治舟艦入湖三月餘況將軍林興珠獻策甚明俟湖水盡涸我船與賊船俱無所施彼時多掣舟師無不足用我之戰艦兵卒頗屬有餘豈可推諉使大事中阻今宜於南靖港君山高家廟諸處俱立營壘斷賊糧道務須困取岳州至於君山高家廟諸處既需大隊應令副都統官保所率之兵毋往江西改赴岳州聽貝勒察尼調遣如舟師必難久頓湖中其速以狀聞

甲子

上諭兵部乘此逆賊驚擾之時大兵亟宜前進勦撫並用  
綏定疆圉授平南王尚之信為奮武大將軍統兵赴永  
興郴州諸處會合大將軍簡親王將軍穆占等併力同  
心以圖進取將軍莽依圖額楚傳宏烈總督金光祖等  
各駐本汛相度機宜規定廣西應給尚之信敕印準滿  
洲大將軍等例遣內閣官員齎往

十月丙申湖廣巡撫張朝珍奏稱各路軍前投誠

官兵發臣標効力者甚衆其間臧否莫辨請以臣  
標投誠効力各弁並嗣後自軍前發來官兵分布  
安插於江南河南內地

上曰今值勦撫並用之時若以現在武昌投降官兵安置  
江南河南誠恐後此來歸者必致疑畏不前大將軍順  
承郡王貝勒察尼等其勿令若輩聚處隨宜分布安置  
於湖廣諸處俾各得其所

十一月辛亥

上命加山東按察使何毓秀太常寺卿工部郎中張光岳  
太僕寺卿奉天府治中佟啟聖通政使司左通政  
安丘縣知縣胡端通政使司左叅議行人司行人  
崔啟元鴻臚寺卿武鄉縣知縣齊漳通政使司左  
叅議各齎

敕諭往諸路大將軍軍前招撫陷賊官員兵民

敕曰自逆賊吳三桂煽惑以來所在官民多被誘惑故陷  
身賊中莫能自拔朕已洞悉情形屢頒敕諭廣示招徠

開其自新之路今逆首吳三桂已伏天誅念在彼脅從  
文武官員兵民人等皆朕赤子素受國家恩養必非甘  
心從逆或志存忠義遲回待時或勢被迫驅無由歸化  
朕甚憫焉茲特命爾等齎敕往陝西大將軍長沙大將  
軍岳州大將軍征南將軍揚威大將軍荊州大將軍等  
軍前特行招撫爾等曩在滇黔素多親識易於開導必  
相信從須宣布德音相機勸諭務令陷賊人員翻然悔  
悟爭先來歸有密謀內應擒斬賊渠及率領兵民獻城

納款者俱赦其前罪論功敘錄加恩安插俱令得所煌  
煌諭旨昭如星日爾等奉茲委任務須殫心籌畫勿失  
事機或親身徑前招撫或先遣人曉諭後乃親往俱同  
各將軍等酌量而行若招撫成功量功大小從優議敘  
加恩爾等其勉圖報効以副朕定亂安民至意

康熙十八年己未正月甲子

上諭兵部頃筆帖式馬爾賽去時令其傳諭諸將軍今岳  
州既經克復應發兵一枝從荆河口渡江立營於華容

石首之地以為根基若由華容石首前往常德澧州一路水潦難行且諸將軍亦曾奏此路水澤甚多艱於前進今在岳州滿漢官兵甚多宜乘賊未及固守湘陰之先水陸並進乘機急取湘陰即望長沙進發若少遲疑觀望則賊堅守城池湘陰江中水洲恐賊立營其上預備火器我舟師欲過甚難不可不乘其未及堅守城池江洲之先急取湘陰也岳州地最險阻偏師足守其取湘陰往長沙應令貝子章泰署前鋒統領杭奇率每佐



領滿洲甲兵十名提督桑額總兵官萬正色全率所部兵并多發綠旗兵整備大礮鳥鎗火器水陸夾攻著行文大將軍貝勒及安親王等知之

二月戊辰安塘筆帖式報大將軍安親王岳樂已復長沙今並進取衡州

上諭貝勒察尼等曰賊失岳州長沙諸要地正當驚惶騷動之時乘機進取衡州擊滅逆賊殊為要務宜將岳州所有大兵并船礮速行多撥增發大將軍安親王軍前

大將軍貝勒察尼等除先遣總兵官張忠標兵外今更  
速發滿洲大兵多撥船礮迅赴長沙此勦滅衡州賊衆  
較諸處不同所調岳州舟師火器早至一日於大事有  
一日之益調遣船礮官兵如或稍遲使賊江中置橋預  
為堅守阻我舟師致遲進取衡州事機則皆貝勒察尼  
悞之也諭到貝勒察尼即撥舟師火器速發安親王軍  
前於滅賊機宜勿致有悞其大將軍簡親王等亦已率  
兵進取衡州兩軍相合之後總用大將軍安親王印信

協力勦滅逆孽恢復衡州諸路如有分兵處仍各用大將軍印信施行

甲戌先是海逆鄭錦乘耿精忠叛竊據漳泉諸郡後耿精忠降諸郡以次收復鄭錦屢敗仍遁入海而廈門金門猶為所據

上欲乘勝蕩平海逆乃厚集舟師規取廈門金門二島以圖澎湖臺灣又以曩時征取廈門金門曾用荷蘭國夾板船

特諭荷蘭國王令具夾板船二十艘載勁兵協力攻取二島至是奉命大將軍和碩康親王傑書等議奏戰艦水師未備荷蘭國舟師又不能預定來會時日海賊現據海澄廈門之固勢難急圖

上曰征勦海寇調發滿洲綠旗官兵甚多福建經制兵外又增兵數萬授水陸提督為將軍以統之宜乘此兵力速行進討若如大將軍康親王所奏需以歲月則供億煩費必將撤還大軍海寇何由殄滅其令康親王會同

將軍總督巡撫提督等詳議以聞

是日

上諭平南王尚之信等曰今長沙岳州諸處俱已恢復偽將軍總兵文武官員船艦兵卒來歸者甚衆又彝陵州對岸之鎮荆山盤踞賊寇盡行潛遁分逐諸路潰敗之賊多所斬戮大將軍順承郡王等已渡江平定湖南安親王又進取衡州諸處宜乘此各路賊寇渙解之際平定廣西大將軍平南王尚之信將軍莽依圖舒恕額楚

傳宏烈總督金光祖等勿失事機速定廣西

乙亥

上諭大將軍和碩康親王傑書等曰剪滅海寇事甚重要  
其令江南浙江總督京口將軍發江浙戰艦各百艘於  
進勦期內送至福建仍許福建增兵二萬大將軍康親  
王等并檄荷蘭國迅調舟師務令如期而至

庚辰

上諭議政王大臣等曰今岳州彝陵之賊以舟來降長沙

之賊焚舟潰遁諸處賊寇困蹙逃竄無有舟楫宜固守  
荆襄乘機速滅賊黨貝勒察尼酌留官兵於岳州水陸  
齊進速會順承郡王軍合力亟取常德沅州鎮遠諸處  
至恢復常德諸郡之後順承郡王勒爾錦貝勒察尼等  
會同安親王簡親王等作何進取雲貴定議具奏其大  
兵進討雲貴宜設將軍總督巡撫提督隨大兵進征吏  
兵二部開列應補者以聞

三月庚戌

上諭奉命大將軍和碩康親王傑書等曰頃因定海舟師少已特增兵今荷蘭國人為寇所阻何以不行撲滅俾得前行音問既未能通舟師必不能如期而至如此則我兵遇有機會可不俟荷蘭舟師即進勦耶抑必俟彼船至日方舉事耶茲以勦蕩海寇增調師旅修理戰艦糜費軍餉甚多大將軍王等宜規取廈門金門速靖海氛不必專候荷蘭舟師

四月壬午



上諭議政王大臣等曰覽學士孔郭岱等奏報廣西悉已  
底定宜速移文令簡親王及穆占等之兵不必進廣西  
但莽依圖舒恕額楚等兵力稍單簡親王及穆占等兵  
內選有馬精兵每佐領三人或四人遣前鋒統領希佛  
率赴莽依圖等軍前於通雲貴要路宜從何路協力前  
進公議進發至於廣西現無官兵平南王或宜同大兵  
前進或宜駐廣西適中要地亦同將軍大臣等共議而  
行其夔陵兵徒爾坐守似屬無用宜整繕甲兵自歸州

巴東作進兵狀以制之巴爾布本在彝陵即遣彼往歸  
州巴東効力并令都統噶爾漢等率兵同總督楊茂勲  
提督佟國瑤等前進宜由何路協力撲滅山賊或規取  
興安聽其酌量而行

康熙十九年庚申正月戊戌

上諭議政王大臣等曰進取四川以滿洲大兵為後應最  
為要策宜令將軍吳璠繼將軍王進寶軍之後將軍鄂  
克濟哈繼將軍趙良棟軍之後陝西已有將軍張勇提

督孫思克巡撫杭愛巴錫等鎮守宜令大將軍圖海帥師前赴漢中接濟進蜀諸軍糧餉鄂克濟哈率漢中滿兵馳往合之吳亶官兵均分統率以為王進寶趙良棟後繼轉餉源源不絕相隨而進

丁未

上諭議政王大臣等曰將軍趙良棟攻克白水壩青川招撫龍安成都指日可復將軍王進寶亦分兵三路於正月初旬進逼保寧逆賊王屏藩等困迫必各潰遁其移

檄嚴飭楊茂勲徐治都等乘機急取重慶夔州勦禦逆寇如遲延觀望悞此事機嚴治其罪

甲寅

上諭議政王大臣等曰將軍趙良棟等軍深入四川保寧重慶夔州諸處速宜平定將軍吳昌王進寶等軍雖抵保寧必於蟠龍山相對立營果爾則恐稽時日今宜面蟠龍山分兵堅壘別遣一軍渡昭化江壁錦屏山下滿漢兵合勢以規取重慶夔州若下重慶諸處則保寧賊

兵歸路阻絕可計日而克假使賊衆勢迫來降則民免重困而全蜀亦不久大定矣

二月辛酉朔

上諭議政王大臣等曰今成都保寧皆已恢復宜乘此機會速定雲貴四川既平湖廣已屬內地其令順承郡王勒爾錦貝子準達都統范達禮等盡率所部兵沂流而上規取重慶順承郡王等即於重慶駐守將軍吳亶鄂克濟哈與趙良棟等同進取雲貴吳亶鄂克濟哈於順

承郡王軍中簡精銳馬兵將之前行總督楊茂勲提督王之鼎駐守成都將軍王進寶駐守四川徐治都還軍守樊陵荊州等處

丁卯

上諭議政王大臣等曰成都保寧順慶諸府今已恢復四川底定湖廣大兵今正分道進定雲貴其廣西滿洲綠旗大兵休息日久亦當乘機速進大將軍簡親王留每佐領兵一人於桂林其餘官兵盡率之往屯柳州大將

軍平南王可駐守貴縣將軍莽依圖馬承廕都統馬九  
玉總督金光祖等可各率所部官兵并酌調平南王藩  
下官兵分道進取雲貴

庚辰

上諭議政王大臣等曰今四川底定大兵宜速赴重慶進  
取滇黔否則逆賊復犯重慶亦未可料其移文吳亶鄂  
克濟哈即馳赴重慶精簡士馬進取雲貴

三月癸卯

上諭兵部頃簡親王喇布奏馬承蔭反叛恐此賊自廣西侵犯廣東今閩疆悉定可令將軍賴塔即率滿兵二千馳赴潮州防守廣東全省

己酉

上諭議政王大臣等曰今楓木嶺辰龍關俱已恢復四川廣西悉皆底定雲貴不日可平若行招撫更可速定雲貴人民得早安其生張起龍本吳三桂屬下之人宜使招撫雲貴可賞其罪著捧敕前往



七月辛卯

上諭兵部初馬承廕及所部官兵背叛蹂躪疆土擾掠生民罪惡已極後見湖南平定廣西恢復窮迫請降朕欲生民早獲寧息悉貫前罪封以伯爵授為將軍仍令管兵標員亦分營補用及大兵規取雲貴無故背恩復叛致悞征討大事今因兵敗勢蹙復窘急來歸令內閣學士薩穆哈速往撥滿漢官兵押送馬承廕及標下守備以上官來京其標兵令督撫提鎮等分隸各營汰其老

弱回兵亦宜散置切勿令其黨聚廣東諸處被難人民  
詳察遣還故土提督哲爾肯可屯駐柳州

八月庚申

上諭兵部廈門金門諸處悉設兵鎮守福建大兵宜量行  
撤還將軍喇哈達副都統馬思文率千人守福州副都  
統紀爾他布倭申巴圖魯率千人守漳州兩軍悉令喇  
哈達統轄餘兵一千令尚書介山侍郎吳努春率之回  
京

又

諭曰閩省近海要區總督提督標下可各設五營兵五千人巡撫標下設二營兵千五百人至通省防守兵依舊額留五萬一千七百五十人餘一萬九千九十五人俱行裁汰提督駐鎮海澄其銅山廈門諸處分設總兵官副將鎮守現在水師留二萬人其餘五千人亦行裁汰已已

上諭兵部廣東省會地關重要合計廣西現有大將軍簡

親王兵及將軍莽依圖兵與都統馬緝等率往之兵每  
佐領共有二十八人今宜檄簡親王令簡軍中精騎每  
佐領五人俾副都統博濟率之馳赴將軍賴塔軍協守  
廣東省城并檄馬緝速赴簡親王軍至所撤福建兵已  
就道者令其來京如未啟行仍暫留福建總漕帥顏保  
現在江西吉安令率所部速赴廣東視南雄韶州何地  
緊要酌量駐鎮以安輯人心

壬申

上諭揚威大將軍和碩簡親王喇布曰聞南寧距雲南邊  
界路僅七站向因逆賊尚之信馬承蔭背叛或未可輕  
進今若輩皆已無濟復何所瞻顧而遲延也現在廣西  
滿兵每佐領幾三十人宜精選強壯有馬者十人益以  
綠旗官兵協力進勦賊可立破矣王其速圖之進兵之  
時令巴爾堪哈爾哈齊為夸蘭大責以軍前報効

閏八月己丑

上諭兵部今進取雲貴為期已近將軍吳賈率兵進瀘州

取合江仍兩路進取雲南湖廣大將軍將軍總督等宜  
速取貴州大將軍公圖海等趣所調陝西兵往四川海  
潮龍感戴國恩率衆獻地先機効順可嘉授為懷忠將  
軍令統所部為前導破賊至賊帥張國柱李本深王會  
高啟隆俱係舊臣或一時迫脅降賊亦未可定宜如招  
馬寶等例書赦罪敕馳驛發趙良棟相機招撫陝西四  
川督撫等速運糧餉毋悞兩路大兵進剿機宜

九月乙丑

上諭議政王大臣等曰據將軍噶爾漢等奏逆賊譚宏率衆至巫山譚宏小醜耳我兵但奮力進擊彼自漸滅將軍噶爾漢提督徐治都等其溯江而上速定疆圉大將軍貝子章泰等果如前疏訂期亟進克復貴陽賊勢何至滋蔓今宜令章泰同將軍蔡毓榮等於文到日速進取貴陽以圖遵義四川諸將若能奮擊雲南貴州出犯之賊則譚宏無所逃匿自當摧陷今宜令專意進剿勿復觀望前此曾命總督哈占馳赴將軍吳璠軍今宜令

由保寧江直進破譚宏以會吳宣并行文大將軍圖海  
酌發軍中滿漢兵為之聲援以分賊勢至運餉四川不  
由彝陵江俱自陝西轉運敘州兵餉度可無虞頃令護  
軍統領佟佳等率增發四川滿兵赴原指之地其漢軍  
官兵一千人文到日即由荊門州一月內赴彝陵鎮守  
著戶部郎中額爾赫圖馳赴彝陵趣將軍噶爾漢等兵  
速滅譚宏諸賊額爾赫圖凡事俱準蘇赫臣例以行吏  
部郎中范承勲亦馳驛追及副都統張長庚軍趣其兼



程而往一月內抵彝陵范承勲仍自彝陵趣官兵追及  
噶爾漢等軍與額爾赫圖同趣官兵擊賊

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷十五